

# Eminenza : skizza

Autor(en): **Cadruvi, Donat**

Objekttyp: **Article**

Zeitschrift: **Igl Ischi : organ della Romania (Societat de Students Romontschs)**

Band (Jahr): **37 (1951)**

PDF erstellt am: **02.06.2024**

Persistenter Link: <https://doi.org/10.5169/seals-882027>

## Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Ein Dienst der *ETH-Bibliothek*

ETH Zürich, Rämistrasse 101, 8092 Zürich, Schweiz, [www.library.ethz.ch](http://www.library.ethz.ch)

<http://www.e-periodica.ch>

## Eminenza

### Skizza da Donat Cadruvi

#### I.

#### L' entschatta d' in dialog

Ina part dils students fa bugen vacanzas, magari duront il semester, magari suenter. La stad ei tuttina per debia pli libra denter purs che denter preits e crunas de cudasch.

Quei tratga Flurin, in stuorn de pézzas e sport. Strusch a casa ch' el reiva per las teissas entuorn, dis en e dis ora. Probabel siara el mintga damaun in mantun giurisprudenza ed auters patratgs perderts cun treis clavs en ina scaffa de ruver. A cuolm e suren van ins bia pli tgunsch senza las barbas de professers schetgs e senza las sbabas dils seminaris.

Ina sonda sera, turnond Flurin giu da Vallatscha, runa el ses calzers de rabaizas cun miarda e tut en casa de President Demuns.

«Ei Rudolf cheu?»

La fumitgasa, nuota propri incantada de quella carga lozza ch' il hosp de mintga sera runa da zuler en, empeila Flurin da scala si ed en stiva pintga, nua che Rudolf prolunghescha il semester de stad e la gimnastica cullas finezias misteriusas della scienzia naturala.

«Ti eis in bi cumpogn, Flurin!» fa Rudolf il beinvegni d' in surstau.

«Persuenter haiel jeu aria frestga el pèz ed ina detga staun-cladad ell' ossa. E ti mattei ina panuglia tschagheras de cudasch entuorn il tschurvi!»

«Basta, mintgin ha il siu. In lozza vid ils calzers ed in auter tschagheras entuorn il tschurvi. In ha quitau pils muscals ed in auter . . . . .»

«Cala, Rudolf, cala avon ch' entscheiver cun Tia gnurn-gna unfiseivla. Empren inaga plitost de tschintschar culs vi-

schins e cun mitga concarstgaun che de bugnar mei siat gadas ad jamna cul suadetsch de tes fantisems. Neu plitost empau per ils grugns entuorn, enstagl de star cheu, magliar tschun gadas a di pischuttas, mintga gada senza fom, lu far dus pass en curtgin, mirar siper la glieud sc' in otgà e lu puspei far mischun sils cudischs dudisch uras a di. Perquei eis Ti pli staunchels e malidis ch' ina matta veglia. Perfin sco eremit fas ti ina miserabla comparsa . . . . »

Contas gadas ha Flurin vuliu runar siu commiliton ora sin via e denter la glieud, ni silmeins mintgaton per las pitgognas entuorn. Adumbatten e mo cul success che Rudolf seccava pli e pli stinadamein denter cuviartas e pupials.

«Teidla, Flurin. Ti sas ch' jeu haiel mias atgnas manieras de viver. E sch' ei plai buc a mi de vargar la sava anoviars, sche stundel jeu dadens, e cun quei basta. Ti vessest daditg sa-viu sefar en de schar cumbien mei cun quei tulanem della via, della glieud, dellas pitgognas . . . . »

Flurin cava il grep en in liug ualti prigulus:

«Mattei — Rudolf Demuns, Rudolf Demuns, il signur blau! Quei ei bein manieras artadas, ni tgei? Manieras san era esser tradiziun, e tradiziun ei vostra sontga scartira. Rudolf Demuns, Rudolf Demuns . . . . »

«Sche ti fusses buca tez perschuadius de tias manzegnas e de tiu tun sfarfatg, jeu dess a ti signur blau! Jeu savess rispunder culs medems dretgs: Flurin Puran, il Giacubin, il selvadi, vischander dell' ambiziun politica, igl amitg dil pievel . . . dil pievel. Ha-ha, dil pievel!

«Sas, distanza ei buc in privilegi dils signurs blaues. Capeschas ti quei, distanza?!»

«Gie, distanza dias ti. Per mei ei quei empau luschezia tar-ladida. E lu gnanc tia luschezia originala, quei ei luschezia ch' ins ha mussau a ti cul det della dinastia dils Demuns. Sas ti in-summa tgei ch' ei tiu agen de quella luschezia e tgei ch' ei ar-tau d' avon sistschien onns?»

Saffermust, co Flurin ei anetgs cursera, co el petga tut-tenina! Rudolf ei sez surstaus dil tun robust e dil tagl de quels plaids.

«Teidla, Flurin. Quei capeschas ti buc e quei capeschas ti mai. Jeu stuess emprender de paterlar cun quei pievel della via, ch' ei per mei ina grondezia imaginara, na — ina specula-

ziun suspectusa de gronds e pigns ambizius. E ti stuesses em-prender de viver ordeifer quels plans de menader e de filantrop senza compass, avon che vuler dar de signurs blaus e de mischedar distanza cun luschezia!»

Flurin insista pli che mai. Cursera duei Rudolf vegnir neu-navon. El fravaghescha sco cun in polisch vid la crosa per spin-drar il pluschein.

«Rudolf Demuns — mintga construcziun de quei che ti raschunas muossa che ti eis in Demuns, e lu in stupent exemplar d'in museum. Quei che ti dias han tschun generaziuns dils Demuns sentiu e practicau, se capescha buc adina cun gronda consequentadad. Opportunitad impedescha meinsvart ils principis, manegias buc era?»

«Tgei ei quei lu: distanza? Mo tschun meters denter tei ed ils purs? Siat meters denter tei ed ils luvrers? La ladezia d'em-pau historia de famiglia denter tei e tuts ils auters?»

Rudolf tauscha la sutga sco de vuler protestar. Cun ina cigarette suenter l'autra zuglia el ils tgaus dils dus pugniers en fem e femaglia. Cheu Flurin che tenta e fora — leu Rudolf Demuns che sedosta buca mo per sesez.

«Flurin, ti sentas forsa la distanza cuntraria de quella ch' jeu tegnel sc'in bien tierm dado mia atgna veta. Jeu sundel vegls sco ti, mon a scola sco ti, haiel in avegnir pressapauc sco il tiu. Mo dasperas eis ti Flurin Puran e jeu Rudolf Demuns. Quei ei ina differenza ed ina distanza che ni ti ni jeu, buc in de nus ha fatg. Ed ina distanza che buc in de nus sa dismetter, era sche nus lessen omisdus. Capeschas finalmein?»

«Pia tuttina mo distanza artada! Vas ti era per las vias culla capiala che tiu basat ha giu purtau il di suenter sias nozzas?»

Ferton che Flurin dosta in surrir davos sias vestas cotsch-nas, sedamogna Rudolf quei ch' el po de buca spluntar sin meisa. Na, spluntar e spluntanar sin meisa, gliez fan ins buc en casa de President Demuns, cunzun buc avon autra glieud.

«Nies discuors ei il meglier attest de nossa differenza e distanza. Ti stas d'ina vart d'in patratg ed jeu da l'autra vart. Fai ina punt sche ti sas. Ti sas durmir meglier sin ina aissa de lenn dir ed jeu meglier en in letg schuber e bi. Co duei jeu far patg cun tschels tschiens che sentan sco ti e tut auter che jeu?»

Aschia daventa la distanza denter ils paucs ed ils biars. Emproval!»

Flurin ha aunc empaù latin sin rucca. Oz sto Rudolf schar splimar da gust.

«Rudolf Demuns — adina Rudolf Demuns e nuot auter! Ti sas far de tia veta exact quei che ti vulas. Ti sas far igl eremit el Casti ni egl uaul sco Frà Clau. Quei fuss era ina pulita differenza. Mo ch' ei fuss pli maneivel denter uaul e pievel che giu da vies Casti . . . .»

Flurin stenda la corda dil discuors infinit. El vesa che la pazienzia ed ils arguments de siu vieifer van alla fin.

«Tschontscha, Rudolf. Jeu sundel aunc ditg buca satisfatgs de tias rispostas.»

«Has ti sentiu aschizun la distanza denter nus, che ti haregias tondanavon? Morda quei ni has ti marveglias de reformar miu tgau e nies Casti?»

«Sche tes vegls ein stai presidents e mistrals, deputai e magnats de vaglia, per tgi ein els stai tut quei? Per els persuls ni per enzaconts mellis concarstgauns? E sche ti scrivas in bi di cudaschs e vendas tia sabientscha per diesch francs il cudasch, per tgi fas ti quei? Quentas ti lu buca ch' ei detti enzatgi che cumpri e che legi, ni sas ti mo de quel che scriva e venda?»

«Oz sundel jeu aunc student. Per mei existan ils concarstgauns mo ordeifer ils tiarms de mia persuna. Ei dat per mei ina famiglia, ina universitat ed in pievel tuttavia neutrals oravontut ina distanza de relaziuns privatas. Jeu drovel nuota discuorrer cun mintgin, jeu sail caminar cun tei per via ni scharstar. Quei ei mia libertad. E quella libertad fa il cuntegn della distanza ch' jeu tschontschel cun tei e malgrad ch' jeu fetschel cun tei discuors inutils.»

Ei splunta treis gadas bufatget:

«Signur Demuns — la tscheina ei pinada. Fagei aschi bien.»

«La fumitgasa cloma il signur Rudolf Demuns a tscheina» beffegia Flurin vinavon.

«Incurabels, ti schani dell' aria frestga! Nus savein continuar in' autra gada, mo lu cun empaù mesira e seriusadad!»

Flurin pren sia capiala grischa e dat la buna notg:

«Stai bein, Rudolf. Nus sevesein damaun. Gie, spetga . . . Damaun fuss ina radunanza della Ligia Giuvenila a Valgronda. Veggas ti forsa era cun nus?»

«Contas gadas haiel jeu detg na?! Radunonzas de Ligias Giuvenilas bein — quei ei nuot per mei. Capeschas plauntiu?»

«Giebein, jeu capeschel, signur Demuns, jeu capeschel me-glier che zacu. Quei ei nuot per in Demuns, schuber nuot!»

In va a tscheina, l'auter per siu fatg. Aschia sespartan ils dus vischins suenter la tontavla discussiun e senza haver anflau ina punt che surtrai in foss.

## II.

### «Nel mezzo del camin . . . .»

Mintgin fa sia via cun agen bastun e cun buna finamira. Rudolf Demuns ei dapi treis onns professer al Liceum Internazional. Flurin Puran stat sin atgnas combas sco advocat della puraglia de Valgronda.

«Advocat Flurin Puran» legia Rudolf Demuns siper la purteggia dil curtgin avon casa. E dus muments pli tard retscheiva ina amazona plein manieras il professer dil Liceum.

«Signur advocat Puran vegn immediat. Fagei aschi bien . . . cloma il zenn pign d'ina vusch carina, memia carina per in tgammin che sto trer la femaglia de process e politicas.

Professer Demuns fa in enclin temeletg, empau denter las retenientschas d'ina innocenza atunila ed igl untgem stinai d'in mat vegl. Entochen ch'igl advocat compara en mongias camischa, en bucca ina pippa sco quella dil cavrer de Carrera, sur il frunt viasi ina blutta che ri sco il meglier sulegl de suenter miezdi.

«Stai tscheu, Rudolf! Tgei caussas, pomai . . . Gie, has ti pudiu ord tauna e tochen en Valgronda?!»

«Flurin, jeu mon alla pesca — se capescha alla pesca ell'aua. In sport fetg discret, la pesca, fetg discret! Ins entaupa dis en e dis ora buc olma, ed aschia ha perfin in professer siu bien ruaus. Haha . . . .»

Rudolf ei buca daventaus meins complicaus, tratga Flurin igl emprem mument. E quei dil sport discret, digl untgir la glieud? Historias d'antruras. Semplamein ina nova versiun della distanza e basta.

«Gie, e co plai quei dar scola el Liceum, Rudolf? Buca mal, ni tgei?»

«Stupent, oreifer, tuttavia stupent! Ins ha sias sis uras en scola e tschellas per sesez en stiva cun ses cudischs. Tgei vulan ins dapli? Hm?»

Rudolf ei buca stel pli cordials e suleglivs che pli baul. Anzi, ina detga pasta-puorla ed umbrivas de purgameinas surtrai-an siu frunt teis e sia fatscha liunga. Sias rispostas ein cuortas, formuladas sco avon ina classa de quels ch' ins sesprova ded educar cun bialas construcziuns precisas. Scadin cass in hosp ch' ins munglass bunamein cavar neunavon igl intent de sia visita.

Sia suletta nunschenadad ei il fimar cigaretas sc' in terc ed il schubergiar las unglas cun ina forschetta. Tut restonzas de pli baul.

«Sche neu, Rudolf, neu vi el «Tgiern crutsch», sche buein nus in sitg, neu!»

«Buca fai breigias, Flurin. Cun risguard dil beiber vin sundel jeu abstinent rigurus. Depi ch' jeu sundel pescadur beibel jeu nuot auter che auas mineralas. — Vi el «Tgiern crutsch?» Tgei hosps, jeu manegel: tgei glieud van en ed ora el «Tgiern crutsch»? Capeschas, jeu less nuota sedar d'enconuscher a mintgin . . . .»

«Mo buca tema, Rudolf. Avonmiezdì ha silpli il caluster vegl seit, suentermiezdi magari il president Tugn e tgi che fa in scart alla liunga. Quels maglian nuota tei. Sas, quels de Valgronda ein nuota pli selvadis che avon onns!»

Il professer, setgs e stendius agradsi sc' in stubel, manezza ses pass in meter e miez sper quels digl advocat. Ell' ustria dil «Tgiern crutsch» fa el duas treis reverenzas plein prescha onz siper las preits che siper la glieud ed emposta sias auas.

«President, enconuscheis buca pli nies Rudolf de pli baul?»

President Tugn sevischina cun ina scargada de creanzas e compliments:

«Stai, stai! Rudolf Demuns . . . . Beinvegni cheu tier nus. Quei ei propri pulit che ti has buc emblidau Valgronda e ses tschuncontasis puranchels, ni tgei? Haha . . . .»

Quei ei plitost il rir d'ina femna veglia senza dents che quel d' in president cun zatgei dignitat en sac dadens.

Rudolf Demuns ei pli serius che mai, nua siu tschiep stgir-verd, sesaulza en pei e sepresenta spir fuomas:

«Professer Demuns, professer al Liceum Internazional. Fa plascher, signur president!»

President Tugn mira sin Flurin sco sch' el less dumandar ina medischina pil cor. Professer Demuns, professer . . . ? In ch' ins ha aunc viu avon paucs onns en caultschas cuortas e cul tapun plein mustgas? Per l' amur de Diu, quels professers, tgei complicaziuns . . . .

«Il signur professer ei mattei vegnius per festivar Flurin, il niev deputau dil Cussegl grond? Fuss atgnamein buca memia baul, mo tuttina, in professer . . . .»

Professer Demuns ri en perfetgas e seperstgisa cun ina gratulaziun retardada:

«Secapescha, mia gratulaziun, Flurin! Jeu hael naturalmein empau distanza della politica, mo tuttina: jeu capeschel fetg e bein tiu plascher, sche jeu laschel vegnir endamen tias profezias dils onns de student.»

In tuosch el pugn seniester less revocar quella reproscha. Ins duess gie emblidar las ambiziuns dil Flurin student, che tschintschava mintga sonda sera suenter il tierz buccal dil futur cusseglier nazional Flurin Puran.

«Igl emprem scalem, signur professer!» fa president Tugn siper Demuns per far il compliment indirectamein agl advocat.

«Giebein, igl emprem scalem! — Mo usa hael jeu tenor urari de continuar la pesca egl ual digl Rogn. Perstgisei, signur president! Adia, signur president! Signur president, stettien bein!»

Las auas mineralas laian nuota emblidar igl urari d' in professer che va alla pesca.

«Nuota per mal, signur professer! Stai bein, advocat!» s'enclina president Tugn siper omisdus.

«Tarladida historia, quei stuer conversar cun glieud de tschella vart digl ual. Tarladida historia . . . jeu repetel: tarladida historia, Flurin!»

Flurin po rir il venter plein. Il professer Demuns ei ina ediziun folio dil student Demuns. U culla violina della fantasia studentina ni cul schumber dil murmignem professoral, zaco dat el sinzur la canzun della distanza. Demuns vegn semplamein buca libers de quei spinatsch.

«Co fas lu era en scola, Rudolf? Sche ti has de conversar culs collegas, culs students, cul cussegl de scola? Co fas lu, pomai?»

Il professer seretegn anetgamein, tauscha la capiala cotsch-na in tec davosgiu e mira tutagraden siper Flurin advocat:

«En scola? Distanza maximala! Jeu sundel leu professer Demuns per scolars e professors, e nuota meins pil cussegl de scola. Mintgin sa, co el ha de plidar cun mei, e mintgin entaupa mei cun respect e seriusadad. Buca sco ella politica, nua che mintgin letga la spida digl auter per survegnir dus treis compliments pli uiarschs che la via de Pitasch. Mai buca star leu cumbel sper cumbel, pagar quintins, beiber giuaden manzegnas ed ils merets d'autra glieud, empermetter la vusch e far de lapun. Dieus pertgiri mei de quella pestilenza — Flurin, ti eis malsauns, ti eis malsauns!»

«Malsauns? Tgei munta quei?»

«Ti fas politica culs mantuns e magliacs, creias che tias ambiziuns tumprivas mondien en vigur. Ti vesas gia tetez a Berna en ina sutga de cusseglier. Ti eis in sco tschels tschuntschien che van per la tiara entuorn e rian siper la glieud, fan tatàs e bibi: Buna sera bein, buna sera tatta, buna sera signur cusseglier, buna sera Augsegner, ed aschia vinavon. Enclins, empermischuns, e cunquei vas ti lu giu Cuera e giu Berna, exact sco ils auters! — Enstagl de star d'ina vart, empau cun dignitat, cun reserva e distanza. Sco jeu, capeschas!»

«Exact sco ti, professer. Deno ch'jeu sundel buca professer e saiel buca scriver cudaschs che negin capescha. Schiglioc exact sco ti!»

Il professer camina dabot e metta tscheu e leu empau luschezia en ses pass. Sco sch'el cartess de survegnir raschun enviers igl advocat, sco sch'el vess mo aunc de spetgar ina giustificaziun definitiva de quei ch'el ha pretendiu avon onns ed oz puspei.

«Flurin advocat, ti vegnas aunc a seregurdar de mei in bi di, crei a mi! Mintgin che ha buca capiu ad uras il camond della distanza, ei daus ella miarda. Baul ni tard. Cunzun ils baus della notg politica!»

Flurin ha siu tgau e mai bunaveglia avunda per crer senz'auter las admoniziuns de professors.

«Tes cussegls ein brigliants, propi d'in professer. Denton,

fuss ei forsa meglier, sch' era in professer vess adina distanza,  
sas, distanza de quei ch' el capescha buc!

Mo secalma, Rudolf, ti vas ussa alla pesca, has tiu bien  
ruaus, laias disturbbar ni de Pieder ni de Paul; suenter vas ti  
puspei a Spinas el Liceum, das scola, miras mo sis uras a di  
silla glieud, cavas numis e combinaziuns ord ils cudischs, repetas  
mintgaton tiu Credo pervia della distanza sontgissima, e cun  
quei ei tiu pensum ademplius. Ni buc?»

«Adia, Flurin! Igl ei uras de calar e per mei uras de sten-  
der la lontscha!»

«Buna ventira, professer, e buca tementa ils scaruns!»

Igl advocat, inquietaus buca smiul dils spropositis e dellas  
prognosas de Rudolf Demuns, varga e ri per sesez, exact sco  
ils scaruns rian mattei, cura ch' il professer seglia d'in crap a  
l'auter, fa mintgaton bogn a peis e schigenta il suadetsch naven  
d'in frunt pensiv. Tscheu e leu seglia in de quels sfarfatgs ani-  
mals alla surfatscha sco de sblatschar in tschiendubel applaus  
alla premura de Rudolf Demuns: Bravo, professer, bravo, e bu-  
na notg!

### III.

#### Demascaziun

Professer Rudolf Demuns ha giu buns e schliats onns. Sias  
publicaziuns scientificas han dau glisch e glischur a siu num,  
senza puder runar igl um sez avon casa. Sia sutga davos meisa,  
amiez plunas cudischs e scartirams, ei caulda per adina.

Buca ch' el s'occupass mo della scienzia naturala. Demuns  
freda mintgaton viaden els caums vischins a mintga carstgaun,  
perfin ella politica dil Cantun. Secapescha senza confessar ad  
in soli sulet carstgaun il minim de sias marveglias. Quei ch' el  
ha zuppentau ina veta de ver tschuncont' onns, quei po el zup-  
pentar vinavon ella stgiradetgna dils misteris privatissims. Mo  
quei ch' el noda mintgaton en siu diari, gliez tradescha il ver  
professer Demuns.

Inaga scriva el en furia:

«Treis generaziuns dils Demuns han fatg politica gronda. Las davosas arbagias de quella dinastia? In professer che sesa denter quater preits ella stretgira de cuviartas e legns scientifics. Saiel jeu esser satisfatgs quell' uisa? Ei quei propi il cuntegn de quella distanza ch' ins ha giu catschau en mia corn ed en mia ossa da pign ensi? Per spindrar il num Demuns ed il nimbus dil Casti.

Distanza de tgei? Dil success personal! Nuot auter. Per mei ei quella distanza stada nuot auter che la decisiun de desister della glisch; jeu hael cuglianau memez ed ils auters, sco sch' jeu fuss libers d' ambiziuns. Silmeins sin quest pupi nausch viel jeu esser sincers per spindrar memez d' ina gronda manzegna: Jeu cattel oz ina gronda largia en mia veta, ina ambiziun mai cuntentada. Mes antenats han buca giu mo distanza, els han era saviu satisfar zaco a quei basegns de mintga carstgaun. Quei attesta: Rudolf Demuns, in pauper professer persul.»

Lu sesprova el puspei ded arver ils barcuns della buna luna e de castigiar il secund Demuns, il Demuns zuppau:

«Tuppadads, politica! Quella ei fatga per ils mediochers, per ils superficials, quels che fan fem e canera e che tschontschon de problems enstagl de sligiar els. Per quels che han il basegns mellidubel de sepresentar als concarstgauns ella mondura cotschna dils agens merets.

Professer Demuns ei franc superiurs ad in Demuns ella politica!»

Aschia semudregia professer Demuns atras las jamnas de ses tschunconta. Sc' ina geina sbatta quei patratg d' ina veta cuncals ed englars atras siu tgau e ses diaris. Entochen ch' el sgrezia dents della ravgia e sgola cun scartira grassa sur las paginas vi:

«Neu tscheu, Flurin! Entras tei sa il professer de cudischs scriver silmeins ina cuorta pagina el cudisch della veta. E sche quella veta ei mo politica. Mo quei ei veta veseivla che sestorschach e semova, che ha aria e flad. Flurin, zanua els zugls de tias atgnas ambiziuns semischeidel jeu per saver empalar, direger, reger; silmeins sco eminenza zuppada. Reger — reger! Tgei dat ei pli bi per in um che duess continuar la gloria dil Casti dils Demuns! Reger... empalar... tgei seit ch' il professer ha!»

Gie, ina seit de tschuncont' onns. Ina che carschenta il

schar encrescher per in vargau che vess saviu esser autruisa. Quei sèspessa entochen viaden en ina specia de fanatissem.

Advocat Puran ei surstaus de quei professer ch' ei tutenina pli energics ed offensivs ch' el sez.

«Flurin, sas ti che tes aspects per las proximas elecziuns dil cussègl nazional ein pigiuradas il davos meins — dapi che Mistral Giacun Calar stat era sin posta?»

«Tgei? Il professer s' occupescha de mes aspects, della politica, de mes adversaris? Haiel jeu schliat' udida, ni tgei?»

Demuns sevischina cun pial grischa sc' in disgraziau, rucruc tauscha el sia sutga datier quella de Flurin.

«Politica — gie! U ch' jeu drovel la politica per far quecher ina ambiziun sco mintgin ha, ni che la politica ei ina medischina era per autras malsognas. In u l'auter. Tgei emporti. Jeu sentel oz meglier che zacu ch' jeu drovel ella, aschi bein sco ti ed auters. E ti astgas era saver quei: Jeu haiel ils mieds entamaun per sfurzar quei che maunca a ti. Tes aspects ein nuota buns, Flurin. Crei a mi!»

«Mes aspects . . . .»

Quei strembla atras la segirezia usitada de Flurin, per l' emprema gada aschi veseivlamein. Quei professer ei tutenina in gigant che para de tener in mognun entamaun, in cunti, in cunti cun tagl. Tgei gianter ei quei?

«Giebein, tes aspects! Jeu vi esser gideivels, Flurin. Ed jeu saiel gidar. Ti sas che biars, ed ils macachis buc il davos, seruschnan e seplaccan, sco ch' els audan in num, in grond num, per semeglia il num Demuns, quels dil Casti a Valgronda. Era quels che lessen derscher il candidat Puran sur rovens diesch dis avon las elecziuns, era quels vegnan a sbabar empermischuns ad in Demuns. Mo mira! Las gasettas san duvrar in professer, cunzun sch' el ha num: Professer Rudolf Demuns dil Casti de Valgronda. — Ins sto far quen cullas fleivlezias dils concarstgauns, sch' ins vul far politica. Ed il carstgaun che fa politica ei aschi fleivels ch' el survescha bugen a quel che fa survir. Ni manegias buc era, Flurin advocat, candidat dil cussègl nazional, deputau dil Cussegl grond — haha, dil cussègl nazional, deputau dil Cussegl grond — haha, Flurin . . . Flurin!»

Advocat Puran stat eri sco ligiaus els latschs d' ina supresa. El stat enschanuglias avon il num Demuns, avon il Casti de Valgronda. Avon in esser gigant.

Quei professer ha forza. El ei buca pli il pescadur eri e malsegideivel, era buca pli il teoreticher della distanza. Quei ei in agitader d' emprema classa, in che sforza l' acziun, in che camonda ils pass de quels che cartevan ded esser ferms e pus-sents.

«Jeu sundel engrazieivels a ti, per l' emprema gada en mia veta, Rudolf. Jeu sentel tiu bratsch e ch' jeu drovel tiu agid. Tia influenza diregia mei — forsa gia avon ch' oz . . . .»

Il professer sa buca seser pli. El smacca ses calcogns ellas aissas dil plantschiu, fa smanis sc' in tribun, camonda, repeta, rispunda e cusseglio cul miers d' ina faultsch — culla ghegna d' ina umbriva ord la historia della famiglia Demuns dil Casti.

Strusch che Flurin ei s' absentaus cun melli Dieus paghis, che Demuns, libers dil professer de tschels onns e sia mondura stretgira, fetga pugns a calun e mira da finiastra ora entuorn ed entuorn:

«Aschia miravan els probabel giu dil Casti — la politica entamaun, la politica el saung. Mintga gnierv in camond, mintga gnierv pussonza. Jeu sentel che quei fuss bi, reger ed empalar, reger e direger . . . .»

Cusseglier nazional Flurin Puran, advocat a Valgronda, fa visetas e visetas a professer Rudolf Demuns. Il pievel ha elegiu Puran e tarmess el a Berna. Las instrucziuns dat in Demuns, distants e nunenconuschents alla tribuna publica, mo de casa egl art della politica: eminenza zuppada che fa beiber ord ina fontauna de tschentaners vargai. Quel che beiba ei cuntents, fa per camond, zoppegia denter las culissas neuadora sil palancau della acrobatica politica.

«Eminenza Demuns — Ti existas finalmein sco eminenza!» smeina il professer ina davosa remarca, grassa e franca, el diari che relata empau historia de mintgadi. Era quella ded oz.